

寶應縣志畧卷之四

附錄詩文

漢文

臧旻救第五種書

臣聞士有忍死之辱必有就事之計故季布屈節於朱
家管仲錯行於召忽此二臣以可死而不死者非愛身
於湏臾貪命於苟活隱其智力顧其權畧庶幸逢時有
所爲耳卒遭高帝之成業齊桓之興伯遺其亡逃之行
赦其射鉤之讎拔於囚虜之中信其佐國之謀勲効傳

寶應志卷四

一

於百世君臣載於篇籍假令二主紀過於纖介則此二
臣同死於犬馬沉名於溝壑當何由得申其補過之功
建其竒奧之術乎伏見故兗州刺史第五種傑然自建
在鄉曲無苞苴之嫌步朝堂無擇言之闕天性疾惡公
方不曲故論者說清高以種爲上序直士以種爲首春
秋之義選人所長棄其所短錄其小善除其大過種所
坐盜賊公負罪至微薄非有大惡昔虞舜事親大杖則
走故種逃亡苟全性命冀陛下無遺湏臾之恩令種有
持忠入地之恨

陳琳爲袁紹檄豫州文

盖聞明主圖危以制變忠臣慮難以立權是以有非常之人然後有非常之事有非常之事然後立非常之功夫非常者故非常人之所擬也曩者彊秦弱主趙高執柄專制朝權威福由已時人迫賚莫敢正言終有望夷之敗祖宗焚滅汙辱至今永爲世鑒及臻吕后季年產產祿專政内兼二軍外統梁趙擅斷萬機決事省禁下陵上替海内寒心於是絳侯朱虚興感奮怒誅夷逆暴尊立太宗故能道化興隆光明榮顯此則大臣立權之

寶應志卷四

二

明表也司空曹操祖父中常侍騰與左悺徐璜并作妖孽饕餮放橫傷化虐人父嵩乞匄携養因賊買位輿金輦寶輸貨權門竊盜昇司傾覆重器操姦闖遺醜本無令德慆狡鋒狹好亂樂禍幕府董統鷹揚掃夷凶逆續遇董卓侵官暴忍於是提劍揮鼓發命東夏廣羅英雄棄瑕錄用故遂與操參策畧謂其鷹犬之才爪牙可任至乃愚佻知慮輕進易退傷夷折衄數喪師徒幕府輒復分兵命銳脩完補輯表行東郡太守兗州刺史被以虎文授以偏師獎就威柄冀獲秦師一尅之報而遂承

資跋扈肆行酷烈割剥元元殘賢害善故九江太守邊讓英才雋逸直言正色論不阿諂身被梟懸之戮妻孥受灰滅之咎自是士林憤痛人怨天怨一夫奮臂舉州同聲故躬破於徐方地奪於呂布彷徨東裔蹈據無所幕府惟彊幹弱枝之義且不登畔人之黨故復援於擯甲席卷赴征金鼓嚮振布衆破沮極其死亡之患復其方伯之任是則幕府無德於兗土而有大造於操也後會鸞駕東反群虜亂政時冀州方有北鄙之警匪遑離局故使從事中郎徐勛就發遣操使繕脩郊廟翊衛幼

寶應志卷四

三

主而使放志專行威劫省禁俾侮王室敗法亂紀坐召三臺專制朝政爵賞由心刑戮在口所愛光五宗所怨滅三族群談者受顯誅腹議者蒙隱戮百辟鉗口道路以目尚書記期會公卿克員品而已加以細政苛慘科防互設贈繳克蹊阬弃塞路舉乎挂網羅動足蹈機罔是以兗豫有無聊之人帝都有呼嗟之怨歷觀古今書籍所載貪殘虐烈無道之臣於操爲甚幕府方詰外姦未及整訓加意含覆冀可彌縫而操豺狼野心潛包禍謀乃欲撓折棟梁孤弱漢室除忠害善專爲梟雄募府

奉漢威靈折衝宇宙長戟百萬胡騎千群奮中黃育獲之士騁良弓勁弩之勢拜州越太行青州涉濟漯大軍汎黃河以角其前荊州下宛葉而掎其後雷震虎步竝集虜庭若舉焱火以焚飛蓬有何不消滅者哉當今漢道陵遲綱弛網絕操以精兵七伯圍守宮闕外稱陪衛內以拘質懼篡逆之禍因斯而作乃忠臣肝膽塗地之秋烈士立功之會也可不勗哉

臧洪荅陳琳書

隔濶相思發於寤寐相去步武而趨舍異規其爲愴恨

寶應志卷四

四

胡可勝言前曰不遺比辱雅况述叙禍福公私切至以子之才窮該典籍豈將閤於大道不達余趣哉是以損棄翰墨一無所酬亦冀遙忖褊心粗識鄙性重獲來命援引紛紜雖欲無對而義篤於言僕小人也中因行役特蒙主人傾盖遂竊大州受任之初志同大事掃清寇逆共尊王室豈悟本州被侵郡將邁扈請師見拒辭行被拘使洪故君遂至淪滅區區微節無所獲申豈得復全交友之道重虧忠孝之名乎所以忍悲揮戈收淚告絕苦使主人少垂古人忠恕之情來者側席去者克已

則僕抗禮之志不爲今日之戰矣昔張景明登壇啣血
奉辭奔走卒使韓牧讓印主人得地後但以拜章朝主
賜爵獲傳之故不蒙觀過之貸而受夷滅之禍呂奉先
討卓來奔請兵不獲告去何罪復見斫刺劉子璜奉使
踰時辭不獲命畏君懷親以詐求歸可謂有志終孝無
損霸道亦復僵尸麾下不蒙蠲除慕進者蒙榮違意者
被戮此乃主人之利非遊士之願也是以鑒戒前人守
守死窮城亦以君子之違不適敵國故也足下譏吾恃
墨山以爲救獨不念黃巾之合從邪昔高祖取彭越於
鉅野光武創基兆於綠林卒能龍飛受命中興帝業苟
可輔主興化夫何嫌哉况僕親奉璽書與之從事行矣
孔璋足下徼利於境外臧洪投命於君親吾子託身於
盟主臧洪策名於長安子謂余身死而名滅僕亦笑子
生而無聞焉本同末離努力努力夫復何言

國朝

更建儒學記

記畧曰皇明稽古右文治天下郡縣興舉學校洪武三
年縣令王驥重建歲久遂朽今四明朱公來令縣邑首

捐俸金以倡慕義於是同寅以及士庶皆翕然樂助供
應之費弗匱有餘主之則朱公也董役則二令黃致協
贊則判簿唐海黃欽典史朱元教諭顏溫訓導梁沂王
安泰經營幹濟則醫學訓科仲景耆老楊恭胡昉士人
張暉趙珉籌畫措置則前監察御史高昭也建大成殿
居學宮之南

先師孔子配哲塑像設焉東西兩廡從祀先賢木主繪像
在焉前則重門設戟後則鬻舍鱗比其講學則有堂肄
業則有齋燕息則有居習射則有圃以至造饌有庖積
粟有庾貯物有庫師弟子之所處者有資焉爲屋凡百
十有九間經始於正統壬戌之冬落成於明年秋七月
甲子

重脩文廟記

記畧曰儒學在縣治南宋嘉祐中始建元毀兵燹洪武
三年詔天下修學校養人材知縣王驥訓導林瑞應詔
重建制未備六年癸丑知縣李恢訓導于惠重修二十
八年己亥教諭李順又重修久而廢墜正統七年壬戌
知縣朱瑗又懼朽腐增堅緻爲殿廡神儀戟門庖厨庾

庫百九器具尤比常制完美而國子祭酒陳公爲作碑
記至今二十五年兩廡櫺星門文昌祠泮池垣塘俱傾
圯無足觀無以爲教學之地於是教諭李麟訓導王相
錢濟會知縣龍淮偕僚寀議重修學欣然願損已俸成
美事因募士民冀震范文等各助已資擇有行義士張
揮楊寧趙恭陸敬房昇祁昱爲首領乃事先成櫺星門
暨兩廡文昌祠重立

聖殿前丹墀甃甃月臺爰築周垣又得耆老陸賢范禮高
顯各發誠勸募官寮及尚義士民施貨妥工塑兩廡先

寶應志卷四

七

賢百九位神像至於泮池橋洞則士民刁氏兄弟良方
助而爲之記其功自天順七年三月三日經始成化二
年八月十日落成

忠祐橋記

記曰嘉靖五年冬十月陳子倅寶應董橋役將成聞人
子奉 命出視邑過焉而偉其功陳子曰茲惟侍御公
劉公爲之公按郡抵楚州敷歷奮厲百廢朋興臨范光
觀其流曰安宜之菑厥湖惟厥壅塞厥壅惟宋涇貫諸
市惟民所止不決則壅壅則菑決則阻阻則病涉君子

惟菑是務去其決諸歲十一月徒扛成十二月輿梁成
民未病涉也凡茲通津要衢杠與梁斯已矣宋涇舊有
忠祐橋邑之通衢歲久圯堰涇以濟人人且病茲鄉大
夫仲氏閔然以利害白劉公公曰所利害果若時其新
之乃命維揚節推周子而戒之曰茲役將以利民也其
慎旃舉其財力之母病于民斯可也周承之轉以屬大
模因相與以翼其成豈曰吾是之能爲聞人子曰偉哉
劉公樂受人言明於用人善克厥事三美具而利興矣
橋廣丈有八尺橫亘十丈高二丈有咫甃周陶甄佐以

石高其欄防失墜也峻其階級固其梁上可以通車輿
下可運萬斛舟涉固不足病矣舊本一券更而三分其
流以免衝決也費數百金而無所掊斂伍工雜舉伍材
咸庀而無所屬於衆龍見而畢務火見而致用水昏正
而栽日至而畢而無所奪于時工鳩僝工會計允當受
其直而無所怠於事其諸驅海東之石來靈臺之民矣
乎猗誠亦偉矣旅山刊木通九道陂九澤同九川奠九
州卽其事也一梁已乎劉公名隅字叔正魯人周子名
道晉人陳子卽大模江右寧人仲名本鄉人以憲長致

政歸聞人子名詮越人丁亥秋七月旱聞人子陳子偕
邑主簿賈子資張子鎧學諭劉子堯臣司訓葉子榮王
子騏禱雨於城隍之祠登橋而望氛焉陳子請落其成
聞人子爲記之維時邑民鄭敵刁穉衡閭數輩皆樂趨
事工亦知義而可使者拜書名于石

遺愛碑文

碑曰嘉靖丁亥歲予營菟裘之地於范湖傍顧徃來於
寶應郊野數聞居民頌長吏之賢曰聞人公吾民父母
也庚寅內 徵去又聞居民思長吏之賢曰聞人公吾

民父母何能使之弗去也予始而駭中而疑終而信且
安曰聞人公真民之父母哉宜民思之而不忍其去也
公名詮邦正字浙江餘姚人也由進士出令是邑是邑
湖壩恒多泛決墊溺巨創弗可言又加以南北大郡夾
翼科差徭役相爲類埒少不辦具必受譴罰公一臨蒞
不勝哀鞠其刻心秉德曰事有出於已而便於民者務
殫心以圖之母寧以身爲身而已也事有出於上而不
便於民者務抗言以救之母寧以官爲官而已也脩築
湖堤甃石啓閉石無寧日更累疏別濬而永其利徭役

必節必減必多方以紓其力訟獄必詳必審必反覆以
求其生蝗蝻蔽野食禾顛天撲滅恫痛若切已身歲苦
稔饑懇請四出必蠲粟出貨務以存活毀撤淫祠正人
心也作養髦士廣正學也其豐仁厚澤洽被於人心者
深矣今公一旦召入內臺則一邑之人景駭嚮震不知
所出惟擁道號呼而已至於策慮幅憶無所發洩乞留
一靴如寄深思云耳予方稔公之行行備歌什以爲觀
風之採適公属下諸生張榮等百餘輩共承醇懿謀勒
貞珉以昭來裔予敢不歆艷而圖之其辭曰於休仁明

寶應志卷四

十

薦生浙湄純懿淑靈遐作邦基宛宛湖壖犖犖瘡痍衡
曹委注來牧來司滲漉者滋帡幪者庇孰我穀伏孰我
响沫明斷繫何徹彼蔀屋惠澤繫何充彼蟻谷力役頓
減匪云武忠肥鮮不食浪傳裴公里門晝開官踰夜旅
熙然春釀樂彼士女鳧舄楚楚棠陰芾芾嗟我父母來
去何速來去何速永言介福永言介福湖濱跌刻唯公
德輝永永無極

遺愛橋碑記

遺愛橋者文溪鄧侯之所作也侯之宰是邑也如定田

糧均壯丁一火甲裁抑夫役招撫流移寬恤貧苦惠政在人種種可錄而獨志橋者橋遺愛之顯著者也侯蒞政纔七月輒以維摩守迂去橋雖成不及自志今年春嗣予來茲耆舊遮道而告曰此鄧公遺澤也先是病涉者凡數年民士雖爲之亦鮮克遂侯獨慨然捐俸金告于我衆庶於是子來之民工萃藝商萃貨財董率者萃勤勞矣未幾月而橋告成適侯下車之初可無言以紀之予因嘆曰橋梁入境之首觀周官之憲章單襄之昌言固王政爾已俗吏不知擲而不問無亦遺君子羞耶

予嘗怪夫世之爲政者當其事則趨避而不肯爲殆夫人之爲其事又沒滅而不肯樂與之成則是天下終無可爲之人亦無可成之事矣予因民之請嘉侯績且樂夫遺愛之不忘故僭爲之志橋故名廣運以犯

御諱鄧子更之而所更則固先君子諱也因更今名侯名繼曾字士魯四川資縣人以掌科出貳金壇迂無錫尹繼以憂補寶應所在有聲文溪其別號云

唐詩

李白贈徐安宜

白田見楚老歌咏徐安宜製錦不擇地操刀良在茲清
風動百里惠化聞京師浮人若雲歸耕種滿郊岐川光
浮麥隴日色明桑枝訟息但長嘯賔來或解頤青橙拂
戶牖白水流園池

白田馬上聞鷺

黃鸝啄紫椹五月鳴桑枝我行不記日誤作陽春時蚕
老客未歸白田已縵絲驅馬又前去捫心空自悲

儲光羲大瞞得長字韻時任安宜尉

大道啓元帥時人居大康中朝發玄澤下國被天光明
詔始端午初筵當履霜鼓鞞近爽氣羽籥映朝陽太守
卽玄圃淮夷成葆彊小臣慚位遠拜手頌靈長

安宜園林見高使君

直道已三出幸從江上迴新居茅茨迥起見秋雲開十
里次舟楫二橋交往來楚言滿鄰里鴈叫喧池臺魚鱉
樂仁政沉浮亦至哉小山宜大隱要自望蓬萊

李嘉祐送皇甫冉往安宜

江皋盡日惟皋水君向白田何日歸楚地兼葭連海迥
隋朝楊柳映堤稀津樓故事生荒草山館空城閉落暉

若問行人與征戰使君雙淚定沾衣

劉長卿過安宜張明府劾居

寂寥東郭外白首一先生
解印孤琴在移家五柳城
夕陽臨水釣春雨向田耕
終日空林下何人識此情

赴楚州次白田途中阻淺問張南史

楚城今近遠積靄寒塘暮
水淺舟且遲淮潮至何處

韋應物將發楚州經寶應訪李二忽於州館相

遇月夜書事因柬李寶應

孤舟欲夜發抵爲訪情人
此地忽相遇留連意更新
停

寶應志卷四

十三

孟嗟別久對月論家貧
一問臨邛令如何待上賓

宋

范仲淹射陽湖

渺渺指平湖烟波急望初
縱橫皆釣者何處得嘉魚

呂存中過寶應湖

半升濁酒試蓴羹賤買魚
鰕已厭烹淺水衣蒲有船過
淡煙籠月更人行

劉華寄寶應丘大夫放

制闡今元帥男邦舊大夫
受成無弊事直上有夷塗
赤

縣畝新入蒼生喘欲蘇底須勞戰士城築守淮隅

文天祥寶應道中

天濶搏南鴈淮南長北驅甘棠成傳舍細柳作康衢四
海隨時變山河往日殊征袍共袞綉夜壁一燈孤

梅堯臣寶應道中

蛙行動萍葉悞觀作遊魚稍稍引兩股已變科斗書

又

青青生水中日日隨水長水落何所依撩亂爲宿莽

又

寶應志卷四

十四

有虫託斷葑斷葑日夕流不知止息處隨天非自由

又

青青老菱葉下有繁實尖浪頭撥船女刺手終不嫌

又

岸傍草樹密徃徃不知名其間有啼鳥似與船相迎

又

水上賣瓜女摘瓜陂上田長麻已不識滿把青銅錢

又

買魚問水客始得鯽與魴操刀欲割鱗跳怒鬣鬣張

又

沙頭風雨來帖水野雲黑如觀曹公營萬弩射船側
元

王惲寶應道中

共說淮南冷今冬氣陡增雲垂梅野雪風結漕渠冰事
弊尋嘗密吾衰用不能據鞍時自笑休苦直如繩

出寶應湖雪中舟行

避冷乘官舸風蓬去若奔兩陂雲影黑一片雪花繁景
與詩相會寒無酒可溫泥橋投宿處寒日暮鴉昏

寶應志卷四

十五

薩天錫射陽湖雜咏

飄蕭樹稍風淅瀝湖上雨不見打魚菰蒲鴈相語

又

秋風吹白波秋雨鳴敗荷平湖三十里過客感秋多

又

霜落大湖淺漁家懸破罾此時生計別小艇買秋菱

又

捕魚湖水中賣魚城市裏夫婦一葉舟白頭共生死

九月七日舟次寶應雨中與天與弟別

解纜不忍放船頭
雨濕衣汝兄猶是客
吾兄獨先歸行
役關河遠虛名骨肉稀
如何淮浦鴈不作一行飛

陳孚過寶應

閔河魚沸血波流
喜見元符下楚州
宮壺明年翬翟掩
爲誰留得採桑鉤

國朝

高穀過寶應湖

綠楊欹側岸沙崩
高塔凌虛見幾層
南去北來成底事
夕陽西下見漁罾

寶應志卷四

十六

儲巔三月過范水

好風貪利涉半日
隔秦郵雜鳥鳴
芳甸閒花占遠洲
酒從今雨飲春及故鄉
遊老大空縻祿湖西欲繫舟

曾槩過寶應湖

茅屋自成聚門前
湖水流平蕪遙見塔
小港曲通舟檣
日留飛燕帆風起
白甌江湖多逸興
况是及春遊

湛若水過寶應湖

疾風吹洪濤洶洶起
春天天際浩無涯
極目空茫然千艘
與萬艘對之不敢前
回飈一借力犯險互
爭先何哉

利害心人命相輕軒

張惟恕過寶應湖

雨霽湖天曉雲光一鏡開鸞凰樓瑞閣豺虎淨霜臺綠
采風前笋青看塔下槐麥香占歲熟野老莫深猜

又

日暮蘭舟繫春殘綺席張岸移柳影靜簾捲菜花香詩
意生魚釣歌聲遠燕檣東風留暫住相伴一流觴

舜原楊瞻和前韻

夜半江風順高帆引索張兩崖枯柳落一陣晚菱香石

寶應志卷四

十七

塊摧長棹湖光映短檣舟中親載籍無意注壺觴

又

樓船剛到岸曙色向天開老鶴立江渚黃花列栢臺新
烟迷海市殘葉落庭槐自作推敲態俗人莫亂猜

儒學訓導楊周南

邑舉人朱曰藩

仲言永

楊啓芳

邑監生朱應辰輯錄

邑庠生張榮

張燦

徐鑛

唐平校正

寶應縣知縣宋佐

縣丞梁舉

主簿鄒恩

徐志高

典史魏昇同刊

寶應志卷四

十八

寶應縣志畧卷之四 終

寶應縣志畧序

寶應舊無志志是畧者

督學侍御北江聞人公也庚寅間公吏茲
土政暇率邑之多彥稽典詢俗叅之一
統志與維揚新舊志博采備錄于是剟
瑕礫而擷蕭裊事核文實者始載於編
其目曰天文地理田賦祠祀官師人物
其附錄者藝文疏議也未幾被

寶應志後序

一

召內庭尋督學南畿復取是稿校訂閱六
祀始克成編時圖刊布以內艱未果是
歲戊戌冬

侍御舜原楊公按邑清戎政務旁午而留
心載籍顧索邑志以稽徃迹予持是編
以進公閱而怡然曰吾友北江之留心
於是邑也速梓以傳予繼公之遺政亦
樂於成遂唯而謀諸邑博楊君周南擇

其二三子校錄因其目釐爲四卷以鎔諸梓夫志古之史周禮外史掌四方之志而郡邑之志由是而興焉觀是編之作效周官之徵諸治也豈特備一邑文獻矣乎天文地理志其順天時因地利以設教也田賦祠祀志其正經界崇正祀以敦禮也官師人物志其政教得失制行臧否以昭勸也其藝文疏議附諸

簡末志其格言正論以垂鑒也據是而達治其易易矣乎舜原公一見而知作者之意遂命鎔以識之嘗觀志之作邑詳於郡郡詳於國是編故多畧焉何哉曰此蓋北江公作志之善者也備則誣誣則疑畧則實實則信信以傳信疑以傳疑此固聖人有取於史之闕文也志成予恐觀者病其畧故特贅焉

旨

嘉靖戊戌仲冬吉知寶應縣事晚學桂林

宋佐謹序

寶應志後序

三

